

**XI**

**ВИДАВАТЕЛЬНА ДІЯЛНОСЦ  
1991-2001. РОКУ**

Гоч у барз чежких, у основи, воєних обставиных, з материялним и кадровим худобством, Союз Русиных и Українцох Горватскей од 1991. по 2001. рок видал дзевец власни кніжки и ище 15 числа “Венчика-Віночка-Vjenčiča”:

1). у 1994. року вишла публикация: “Rusini i Ukrajinci u Republici Hrvatskoj (1991–1994),

2). “Rusini i Ukrajinci u Republici Hrvatskoj” и идуцого, 1995. року.

Потим:

3). репринт видане: “Dr. Vinko Žganec RUSINSKE PJESME –РУСИНСЬКИ ПИСНІ- РУСИНСКИ ПИСНІ“ MCMXLVI у 1996. року;

4). “Каталог Нова думка 100“, истого 1996. року;

5). “30 роки Союзу Русиных и Українцох Горватскей 1968-1998“, того 1998. року у авторстве Влади Костелника и Гавриїла Такача;

6). “Поезия и проза Русиных и Українцох у Горватскей“ 2000. року у виборе Любки Фалцовой

7). “Думки з Дунаю“, рочни алманах Союзу и редакції “Новей думки“, число 3; за 1990-2000 роки, того истого 2000. року,

8). “Думки з Дунаю“ число 4, идуцого, 2001. року. На концу

9). “Нова думка“ у естве свойого народу – 1997-2001“, року, тиж так того истого, 2001. року.

Доложме и поведзени 15 виданя “Венчика-Віночка-Vjenčiča” .

У року 1992., вишло 13. число; потим 1994. року 14/15, та 1995. року 16/17. число. Дальши числа , од 18. по 27. виходзели у редагованю Оксани Тимковей-Дітковей од 1998. по 2001. рок, док перши ту спомнути ушорйовал Гавриїл Такач, як главни и одвичательни редактор и “Новей думки“.

Рахуюци, спрам того, и “Венчик“, вец Союз Русиных и Українцох Горватскей од 1991. по 2001. рок, лебо у тих 11 роках, видал шицкого 24 кніжки, числа дзевецинского часопису, окрем 27 числох “Новей думки“.

Нет сумніву же то аж импозантне число виданьох и у тих чежких, аж и найчежших роках иснованя и ділованя Союзу Русиных и Українцох Горватскей. Видавали их малочислени людзе, котри не мож начишліц анї на єдней руки. Укладали свою любов и вельку прихильносц гу своїм Русиним и Українцом у Републики Горватскей и ширше, аж и найширше цо може буц, як свойо доприношене вкупней рускей и українскей культури од давен-давна по нешні дні, и на шицких просторах и у шицких часох свойого живота.

Але, охабме часу най вон пове конєчне и необкеруюцо точне и правдиве слово о тим шицким. Потамаль жадаме же би ше така, ище и богатша видавательна діялносц нашого Союзу предлужела и у будуцим. Заш на хасен шицких нас, Русиных и Українцох, перше у отечестве, Републики Горватскей, а вец и вельо далєй и ширше, у чаше и просторе Русина и Українца.